

TEZAUUR LITURGIC
13 DECEMBRIE

ACATISTUL
SF. CUVIOS
ARCADIE
DE LA
VIAZEMSK
ȘI NOVOTORJ



MOSCOVA, 2000



Акафист

святому преподобному

Аркадию Вяземскому

и Новоторжскому

Кондак 1

Избранный Господем сил и Царем славы, подвиги своими предивный образ иноческаго жития явивый и равноангельски на земли поживый, блаженне Аркадие, достойно восхвалити тя не возможем мы, любовию чтущии тя. Ты же предстательством твоим ко Господу от всяких бед свободдай всех, зовущих ти:

Радуйся, преподобне отче Аркадие, Новоторжский чудотворче.

Икос 1

Архангел и ангел лики со умилением зряху на пречудное житие твое, преподобне Аркадие; во плоти бо, аки безплотен, пожил еси и еще во отроческих летех, всем сердцем и душою

Господа своего возлюбив, чистоту души и тела
твоего соблюл еси и тако дивное житие твое,
Господеви работая, проводил еси. Сего ради
слышиши от нас пение сицево:
Радуйся, православныя веры утверждение;
Радуйся, града Вязьмы благодатное возвращение.
Радуйся, корени благодатного прозябение;
Радуйся, Божия благодати сосуде избранный.
Радуйся, свещник, Божественною благодатию
возжженный;
Радуйся, луче солнца правды возсиявый.
Радуйся, на земли, аки ангел поживый;
Радуйся, Духа Всесвятаго приятелище и жилище
бывый.
Радуйся, яко ко Христу прилепился еси;
Радуйся, яко умными очима Бога зрети научился
еси.
Радуйся, преподобне отче Аркадие,
Новоторжский чудотворче.

Кондак 2

Видя непостоянство и суету мирскую, земную
же красоту и славу ни во что же вменив, подвиг
юродства измлада на себе подъял еси и в
безмолвии мнозе, непрестающих слезах и

постоянном плаче о гресех своих подвизался еси, поя Богу: Аллилуия.

Икос 2

Разумом просвещенным своим уразумел еси, яко век, иже на земли, преходящ есть, век же он, яко непреходящий возлюбил еси; сего ради еще юн сый телом и млад летами, обаче велик и силен пред Богом и человеки был еси. О сем убо дивимся и восхваляем тя сице: Радуйся, яко светильник граду Вязьме юный был еси;

Радуйся, яко от юности твоея Господа возлюбил еси.

Радуйся, Тому Единому себе совершенно предавый;

Радуйся, славу маловременную презревый.

Радуйся, духови плоть свою покоривый;

Радуйся, душу свою от страстей очистивый.

Радуйся, желанием отечества небеснаго утвердивыйся;

Радуйся, нетленных благ насладивыйся.

Радуйся, душегубительнаго и гордаго змия смирением своим убивый;

Радуйся, подвиги своими жителей града своего удививый.

Радуйся, преподобне отче Аркадие,
Новоторжский чудотворче.

Кондак 3

Силою Божию укрепляемый, преподобный
Ефрем, от града Торжка в славный град Киев
научения ради иноческаго хождаше; пришед же
в град твой и видев тя, аще и юна суща, обаче
подвиг многих исполнена, благослови тя именем
Божиим на путь духовнаго преуспeyания и
прослави Бога, вопия Тому: Аллилуия.

Икос 3

Имел еси, преподобне, наставника твоего и
руководителя и старца мудраго Ефрема
архимандрита, и к тому наставления ради
духовнаго от града своего во обитель
Новоторжскую многожды притекал еси; темже и
в добродетели возрастал еси, и от людей
ведущих тя, слышал еси таковая:
Радуйся, великаго учителя доблий учениче;
Радуйся, неусыпный к Богу молитвенниче.
Радуйся, в послушании наставнику твоему добре
пребывый;
Радуйся, постом и воздержанием плоть свою
смиривый.

Радуйся, кротостию сердца твоего изряднее
солнечного сияния просиявый;
Радуйся, вся в мире суетная возненавидевый.
Радуйся, духовные подвиги паче всего
возлюбивый;
Радуйся, воинства небесныя подвиги своими
удививый.
Радуйся, яко добродетелей многих сокровищем
обогатился еси;
Радуйся, яко еще в юности многолетних
духовным житием превзошел еси.
Радуйся, преподобне отче Аркадие,
Новоторжский чудотворче.

Кондак 4

Бурю мирскаго жития и страстей юношеских
нощными стоянии и подвигом воздержания
укротил еси, преблаженне Аркадие, и постом
сугубым и чистотою телесною душу твою
украсил еси: темже прежде принятия
ангельскаго образа, уже инок изрядный был еси
и научил еси всех воспевати Богу: Аллилуия.

Икос 4

Слышаще и видяще Вяземстии людие чистое
житие твое, преподобне Аркадие, прославляху

Всемилоствиваго Бога, даровавшего им такового юного подвижника и теплаго молитвенника, понеже убо ты, отче, псаломскую песнь исполняя, не давал еси сна очима своима, ни дремания веждама своима, обаче на камени велицем, иже бе при церкви Божии, по вся нощи в пении и молении подвизался еси. Сего ради любовью вопием ти: Радуйся, денно и ношно в молитве пребывый; Радуйся, человече Божий, в мире сем ангельски поживый.

Радуйся, чистоты и праведности благоуханный цвете;

Радуйся, Божественно дарованное сокровище.

Радуйся, девство свое непорочно соблюдый;

Радуйся, плачем и слезами душу свою от греховных скверны омывый.

Радуйся, безмолвия твердаго хранителю;

Радуйся, заповедей Божиих усердный исполнитель.

Радуйся, яко житием твоим ангелы возвеселил еси;

Радуйся, яко подвиги твоими духов злобы посрамил еси.

Радуйся, преподобне отче Аркадие, Новоторжский чудотворче.

Кондак 5

Боготечней звезде уподобился еси,
досточудне Аркадие, всем хотящим о Господе
подвизатися и спасения вечнаго ищущим:
якоже бо солнце многосветное просветися житие
твое светом твоих добродетелей и подвиг
чудесных сияньми. Темже и мы, невечерним
светом славы твоея озаряеми, просветившему тя
Своею благодатию Богу согласно вопием:
Аллилуия.

Икос 5

Видев некия вдовицы сына, мала отрока,
ядуща млеко, и из того же сосуда ядуща млеко
гада, святе Аркадие, воздохнув рекл еси: в
Троице славимый Боже, да не будет сего гада в
граде Вязьме и за тридесять поприщ. И от того
часа град сей и область его от змиев и гадов
избавил еси даже до днесь. Таковому твоему
чудодействию дивяшеся, со умилением взываем
ти сице:
Радуйся, дар чудес измлада от Господа
восприявый;
Радуйся, чистотою и смирением Богу угодивый.
Радуйся, Духа Пресвятаго пресветлое озарение;
Радуйся, града своего Божественное

благословение.

Радуйся, чудес предивных совершителю;
Радуйся, у Престола Царя Небеснаго за нас
теплый ходатаю.

Радуйся, от десницы Вседержительныя
увенчанный;

Радуйся, от нас грешных на земли
прославленный.

Радуйся, яко крест свой взем, Христу Богу
последовал еси;

Радуйся, яко козни демонские крестом низложил
еси.

Радуйся, преподобне отче Аркадие,
Новоторжский чудотворче.

Кондак 6

Проповедник евангельскаго терпения,
кротости и смирения был еси, блаженне
Аркадие, егда в подвиге юродства твоего
глумления, поругания и презрение от людей злых
претерпел еси, иже духовными очима ослеплени
бывше, не мняху тя быти светильника Божия
благодати и святых юродства подражателя и не
ведяху укрепляющему тя Богу пети: Аллилуия.

Икос 6

Возсия тебе свет новыя благодати,
преподобне Аркадие, егда отеческий град, дом и
род твой оставив и к наставнику твоему,
преподобному Ефрему, пришед, во обители
Новоторжстей вселился еси, и от рук сего старца
пострига монашескаго сподобился еси, и образ
многих добродетелей иноческих в себе носил
еси. Сего ради слышиши от нас похвалы сия:
Радуйся, уставов иноческих крепкий хранителю;
Радуйся, кротости предивный учителю.
Радуйся, подвигов монашеских ревнителю;
Радуйся, смирения добрый наставниче.
Радуйся, иноческаго жития добрый поборниче;
Радуйся, во всеоружия Божия одеявыйся.
Радуйся, щит веры и шлем спасения стяжавый;
Радуйся, меч духовный, еже есть слово Божие,
сладце возлюбивый.
Радуйся, воздержанием удобренный;
Радуйся, нестяжанием украшенный.
Радуйся, подобне отче Аркадие,
Новоторжский чудотворче.

Кондак 7

Хотя быти инок совершен, в послушание отцу
своему духовному весь вдался еси, достохвальне

Аркадие, и тому усерднейший в подвизах иноческих подражатель быв, научился еси купно с ним выну взывати к Богу: Аллилуия.

Икос 7

Дивную двоицу, благодати Божией исполненную и добродетельми иноческаго жития украшенную, яви нам Новоторжская обитель: ты, блаженне Аркадие, и богомудраго учителя твоего, преподобнаго отца нашего Ефрема, ему же ты добре поревновав, на высоту духовнаго совершенства восшел еси. Сего ради слышал от всех похвалы сия:
Радуйся, преподобных красото;
Радуйся, духовнаго жития чистое зеркало.
Радуйся, молитв наших благоприятное кадило;
Радуйся, иноков благочестивых многосветлое солнце.

Радуйся, монашествующих предивное украшение;

Радуйся, подвижников образе благоугождения.

Радуйся, светом добродетелей твоих град и страну нашу озаривый;

Радуйся, житием твоим Отца Небеснаго прославивый.

Радуйся, любовь Христову в сердце своем

имевый;
Радуйся, заповеди Того сохранивый.
Радуйся, преподобне отче Аркадие,
Новоторжский чудотворче.

Кондак 8

Странник во юдоли земней быв, век сей, яко маловременен, оставил еси, и оное житие и век будущий нескончаемый мудрствуя, вся нетленная тленными стяжати потщался еси, отнюдуже и тело твое духови поработил еси, да Христа Единого приобрящеши, поя Тому: Аллилуия.

Икос 8

Всем сердцем твоим и всею душою твоею обители святых и благоверных князей Бориса и Глеба послужил еси, блаженне, иноческую братию послушанию, кротости, терпению и непрестанней молитве научая, наставнику же твоему во устроении обители неленостно помогая, темже и благоукрасися обитель сия елико домовным строением, тако и жития иноческаго насаждением. Сего ради вопием ти: Радуйся, постников похвало; Радуйся, обители Новоторжския предивная

красото.

Радуйся, всем святым подражателю;

Радуйся, грядущаго града взыскателю.

Радуйся, яко бденными молитвами и постными подвиги, яко благовонными ароматы, душу твою облагоухал еси;

Радуйся, яко тую от страстей пагубных свободил еси.

Радуйся, духовную доброту соблюдый;

Радуйся, телесную чистоту сохранивый.

Радуйся, плоть свою возненавидевый;

Радуйся, вся красная мира сего презревый.

Радуйся, преподобне отче Аркадие,

Новоторжский чудотворче.

Кондак 9

Весь от юности Господеви преданся еси, преподобне Аркадие, и к Нему добродетелию приблизился еси, тленная бо яже на земли оставив, нетленное обрел еси богатство, и ныне во обителях небесных водворился еси со ангелы святыми и всеми праведниками, купно с ними ликовствуя и поя Богу: Аллилуия.

Икос 9

Витии земнороднии не возмогут по
достоянию восхвалити досточудное житие твое,
преподобне отче, твоя подвиги и добродетели,
имиже дух твой возвысив, в горния скинии
вселился еси. Мы же таковым дивящися, во
умилении сердец наших приносим ти хваления
сия:

Радуйся, добродетельная маслино, в дому Божии
возращенная;

Радуйся, шипок благовонный в пустынных
удолиях процветший.

Радуйся, тленная вся земная оставивый;

Радуйся, нетленную славу от Господа
восприявый.

Радуйся, граду нашему столпе непоколебимый;

Радуйся, обители наша молитвенниче
усердный.

Радуйся, небесных чертогов обитателю;

Радуйся, райских селений гражданине.

Радуйся, любовьию твоею всех нас покрываяй;

Радуйся, исцеления неоскудно нам источаяй.

Радуйся, подобие отче Аркадие,

Новоторжский чудотворче.

Кондак 10

Спасение вечное восприим от Христа, Царя славы, Того моли, преподобне отче, да благочестно в сем веце поживше, в будущем наследие вечное обрящем, купно с тобою вопия Христу Богу: Аллилуия.

Икос 10

Стена еси и твердое заступление всем с молитвою притекающим к тебе, богомудре Аркадие; не презри убо и наша моления, с любовью к тебе возносимая, и предстательством твоим испроси у Христа Бога всем по коегождо потребе даровати, да зовем ти сице:
Радуйся, прошения наша добре исполняй;
Радуйся, всем нам скорую помощь подаваяй.
Радуйся, прибегающим к тебе скорый помощниче;
Радуйся, предивный чудотворче.
Радуйся, неусыпный о нас со ангелы предстателю;
Радуйся, на демонские полки победный воителю.
Радуйся, града Торжка пресветлый светильниче;
Радуйся, обители твоея крепкое ограждение.
Радуйся, елеем радования духовнаго нас умащай;

Радуйся, блистанием чудес твоих нас озаряя.
Радуйся, преподобне отче Аркадие,
Новоторжский чудотворче.

Кондак 11

Пение сие похвальное не презри, досточудне отче Аркадие, но прими е милостивно и покажи твое о нас отеческое милование; не можем бо по достоинству восхвалити тя, но елика возможем от усердия нашего дерзнухом, да тако восхваляюще тя, прославльшему тя Богу выну вопием: Аллилуия.

Икос 11

Светозарна светильника Церкви Своя яви тя
Солнце Правды Христос Господь, преблаженне
Аркадие, невещественным светом благодати
Божией горяща и мглу неведения нашего
озаряюща. Темже просим тя: просвети нас,
омраченных греховными страстьми, да выну
воспоем тебе:
Радуйся, звездо, на путь спасения приводящая;
Радуйся, деннице, просвещати Церковь
Христову восшедшая.
Радуйся, яко свет учения Христова в сердце
своем носил еси;

Радуйся, яко тем просвещаем, тьму страстей
всегубительных разогнал еси.
Радуйся чудес дарований сподобивыйся;
Радуйся, во свете невечернем водворивыйся.
Радуйся, заблуждших путеводителю;
Радуйся, немощствующим исцелителю.
Радуйся, печальных утешителю;
Радуйся, помощниче наш и покровителю.
Радуйся, преподобне отче Аркадие,
Новоторжский чудотворче.

Кондак 12

Благодатию данною ти от Бога, всех чтущих
священную память твою и молитвенно тя
призывающих, от бед избавляеши, недуги
исцеляеши, ко спасению руководиуеши и
научаеши со умилением и благодарением
взывать к Богу: Аллилуия.

Икос 12

Поюще дивнаго во святых Бога, явльшего тя
стране нашей чудотворца преславнаго,
милостиваго ходатая и теплаго заступника,
ублажаем пречудное житие твое, преподобне, и
просим тя: буди молитвенник присный о нас
пред Господем, да любовью вопием ти:

Радуйся, Царствия Христова наследниче;
Радуйся, чудотворений неиссякаемый
источниче.

Радуйся, со ангелы Троице Пресвятей ныне
предстояй;

Радуйся, венцем славы небесныя увенчанный.

Радуйся, яко благодатию Божиею благоухаеши;

Радуйся, яко тою мрак греховный разгоняеши.

Радуйся, яко верных сердца утверждаеши;

Радуйся, яко неверных ко Христу приводиши.

Радуйся, яко на земли и на небеси славу

безсмертную достойно восприял еси;

Радуйся, яко радостей небесных сподобился еси.

Радуйся, преподобне отче Аркадие,

Новоторжский чудотворче.

Кондак 13

О, великий угодниче Христов и преславный
чудотворче, преподобне отче наш Аркадие,
приими недостойное сие моление наше, с
любовию ти приносимое, и благоприятными
твоими к Богу молитвами огради обитель сию,
град сей и всю страну нашу от междоусобий
гибельных, от всяких зол и обстояний, от враг
видимых и невидимых; даруй же нам в веце сем
жития нашего исправление, заповедей Божиих

соблюдение, в грядущем же вечных мук избавление и Царствия Христова наследие, да вкупе с тобою в скиниях небесных вопием Богу: Аллилуия.

Этот кондак читается трижды, затем икос 1-й и кондак 1-й

Молитва

Небеснаго вертограда Христова юная лозо, Церкви Православныя похвало превознесенная, града и обители нашея крепкое забрало и утверждение, всех с верою и любовью притекающих к тебе тихая отрада и утешение, преподобне и богоносне отче наш Аркадие. Во дни тяжких зол, обышедших страну нашу, к тебе, яко к молитвеннику благодатному и скорому помощнику, усердно прибегаем и усердно просим тя: пролей теплое твое ходатайство ко Всемилостивому Спасу, да милостив будет к неправдам нашим, да утвердит миром и любовь страну нашу, град сей, обитель сию и вся грады и веси наши от всякаго злаго обстояния, от глада и пагубы и междоусобныя свары добре да сохранит; Церковь же Свою святую да избавит от лютаго гонения, от смертоносныя и душегубительныя

язвы неверия, да укрепит и возрастит ю; всех же нас от обидящих и ненавидящих нас да свободит и вся полезная к временному житию и спасению вечному дарует твоим предстательством и заступлением, да тако прославится тобою пречестное и великолепое имя Святыя Троицы Отца и Сына и Святаго Духа во веки веков. Аминь.



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**